



Mga kaso nga gipasaka sa NORDECO batok Kuya Gov, ex-PA Rabanoz, gibasura sa Ombudsman

Gibasura sa Ombudsman ang mga kasong kriminal ug administratibo batok kang Governor Edwin “Kuya Gov” Jubahib ug kanhing Provincial Administrator Engr. Josie Jean Rabanoz, nga gipasaka niadtong Hunyo tuig 2023 sa kasamtangang electric utility sa probinsya nga mao ang Northern Davao Electric Cooperative (NORDECO).

Base sa reklamo, ang duha ka opisyal sa probinsya nagpakita og dakong suporta sa petisyon nga gipasaka ngadto sa 18th Congress, nga adunay tumong nga pulihan sa Davao Light and Power Company (DLPC) ang NORDECO pinaagi sa pangpangulo sa Gobernador sa tulo ka rally isip suporta sa House Bill Nos. 5077, 6740, ug 7047.

Samtang, naapil sa reklamo ang kanhing Provincial Administrator sa alegasyon nga nagpakanaog kini og memorandum nga nag-awhag sa mga empleyado sa Kapitolyo nga mutambong sa motorcade ug rally gamit ang mga sakyanan og kabtangan sa Probinsyal nga Panggamhanan.

...Sumpay sa pahina 2



Sulod sa mga katuigan, tatabaw ang pahayag sa kabawhan sa ilang dakong pagkadiskontento sa NORDECO (kanhing DANECO).

SCAN ME!

Mamahimong i-scan ang QR code aron makita ug madungog ang tibuok istorya ani nga balita



Mga baryuhanon, midagsa sa Handog Pasasalamat Program ni Kuya Gov

Nagsugwak ang mga baryuhanon sa gipahitabong Handog Pasasalamat Program ni Governor Edwin “Kuya Gov” Jubahib kaniadtong Pebrero 23 ning kasamtangang tuig sa Sto. Tomas Central Elementary School.

Kini nga programa bahin sa lahi na usab nga hugna sa pagpangapodapod og bugas nga gihimo sa nagkadaiyang lungsod sa probinsya.

Malipayon nga gidala sa mga taga Barangay Tibal-og ang ilang nadawat nga 3 kilos nga bugas. Gihatagan og



...Sumpay sa pahina 9 Malipayon nga gisugat sa mga baryuhanon ang paghatod og gasa sa Team Jubahib para sa ila.

SA SULOD...

2

Persona non grata batok sa mga Uy padayon

4

Handog Pasasalamat ni Kuya Gob, mainting gidawat sa mga Tagumenyos

9

Mas maayong serbisyo publiko, gipasigud sa duha-ka-adlawng seminar sa Kapitolyo

12

Proposed Port Zone Delineation sa IGACOS, gi-endorso sa PDC

Persona non grata batok sa mga Uy padayon

Nagpabilin ang deklarasyon sa mga tribo nga persona non grata batok nila Tagum City Mayor Rey Uy ug Vice Governor De Carlo Uy tungod sa ilang pagbiay-biay sa mga IPs ug pagtawag kanila nga "tapulan".

Kini ang hiniusang deklarasyon sa Provincial Tribal Council sa Davao del Norte ug sa tanang mga tribal chieftain sa Lungsod sa Kapalong sa gipahigayon nga press conference niadtong Pebrero 24, 2025.

Gikondena sa mga datu nga imbalido, kon dili husto, ang gihimong lakang sa grupo ni Ongging Masaloon aron sa pagbawi kuno sa persona non grata batok sa mga Uy.

Mipirma ang 27 ka mga datu sa Kapalong sa IPS Resolusyon No. 1, series of 2025, aron sa pagpadayon sa deklarasyong persona non grata batok sa mayor ug bise gobernador "tungod sa diskriminasyon batok sa tribo".

Una nang mipirma sa pareho nga resolusyon ang 275 ka mga datu ug mga miyembro sa pito ka mga tribo sa gipahigayon nga IPS General Assembly sa

Barangay Gupitan niadtong Pebrero 21, 2025.

Ingon sa mga tribal chieftain nga walay otoridad si Masaloon, sanglit dili siya datu ug usa lamang kining lider sa mga bagani.

Niingon usab si Provincial Tribal Council (PTC) Chairman Datu Art Davao nga walay laing grupo ang dunay katungod aron bawion ang maong deklarasyon kundili ang PTC lamang tungod kay sila ang nipirma sa resolusyon nga gisang-at ngadto sa National Commission on Indigenous People (NCIP).

"Sa tinuod, kami sa PTC ang ni-file sa persona non grata ug kami ra ang pwede mobakwi ana. Walay katungod si Datu Ongging o bisan kinsa man kay kami ra ang dunay katungod ana," maoy gipahingusan ni Davao.

Kahinumduman nga niadtong Abril 17, 2024, 18 ka mga miyembro sa Provincial Tribal Council sa Davao del Norte ang mipirma sa Resolution No. 3, series of 2024 nga mideklara sa persona non grata batok sa mga Uy, buot ipasabot nga dili na sila "welcome" sa mga komunidad sa IPs.

Nahitabo kini pagsugod sa paglingkod ni Vice Governor Oyo Uy isip acting governor sa dihang gipahamtangan sa Malacañang og preventive suspension si Governor Edwin "Kuya Gov" Jubahib tungod sa mabaw nga mga rason.

Dayon nga miadto sa Kapitolyo ang mga IPs aron mopadangat sa ilang suporta kang Kuya Gov, pero nasakitan sila pag-ayo sa pagtawag kanila ni Mayor Uy nga "mga tapulan".

Kini gipanghimakak ni Bae Gemma Rarangol ug iyang gipahingusan nga nanginabuhi og tarong ang mga tribo aron mabuhi nga malinawon ug moasenso sab.

"Dili mi tapulan. Kabalo pud mi manginabuhi," ingon niya.

"Gisakitan jud mi kay gitibuok pagbiay-biay sa tribo. Okay lang unta kung usa ra ka IP ang giingnan. Dili mi bato. Morespeto mi basta lang respitohan sab mi. Ang kaulaw namo dili mabayran sa salapi. Nangingkamot mi magpuyo nga malinawon," sulti sab ni Datu Edgar Mantayona.



Mga kaso nga gipasaka...

Depensa sa gobernador nga ang iyang aksyon subay sa iyang tahas nga alagaran ang katawhan nga adunay dakong pagtagad sa iyang responsibilidad, pagkamaunongon, pagkaepisyente, ug patriyotismo. Matud niya nga sulod sa mga katuigan, tataw ang pahayag sa katawhan sa ilang dakong pagkadiskontento sa NORDECO (kanhing DANECO). Kini makita sa kapin 10,000 ka pirma nga nakalap gikan sa mga lumulupyo sa tibuok siyudad ug munisipyo nga giserbisyuhan karon sa NORDECO. Dugang niini, dako sab ang suporta sa nagkalain-laing komunidad sa maong laraw pinaagi sa petisyon nga gisuyu sa mga mayor sa probinsya, ingon man ang gipirmahan nga mga petisyon

gikan sa nagkadaiyang mga barangay. Gipasabot ni Kuya Gov sa iyang counter-affidavits nga ang motorcade ug rally wala gihimo aron ipakita ang suporta ngadto sa DLPC sa bisan unsang paagi. Ang maong mga kalihokan nagsilbi isip usa ka information campaign bahin sa tulo ka house bills ug nagtinguha sa pag-edukar sa publiko bahin sa dakong mga kausaban, mga rason nganong namugna kini, ug posibleng epekto niini sa kinabuhi sa mga konsumante. Depensa usab ni Rabanoz nga ang iyang paghimo sa memorandum usa ka lehitimong aksyon sa pagtuman sa mando sa labaw nga opisyal. Dugang niya, ang pagtambong sa mga empleyado sa maong kalihokan subay sa memorandum,

boluntaryo nga desisyon sa mga ningtambong. Sa mga resolusyon nga gipakanaog, gibasura sa Ombudsman ang reklamo sa NORDECO gumikan sa mga naunang gipasaka niini nga adunay parehong facts, isyu, insidente ug alegasyon. Ingon man sa kaso batok kang Rabanoz, tungod sa kakulangan sa ebidensya nga muduot sa kanhing Provincial Administrator kabahin sa alegasyon nga paglapas sa mga probisyon sa RA 3019 ug RA 7160. Ang resolusyon gikan sa Ombudsman usa lamang sa mga ebidensya nga magpamatuod nga dakong bakak ang mga isyu nga matud pa daghan ang kasong giatubang sa gobernador. Mga isyu nga gilabay kaniya sa mga kaatbang niini sa pulitika.

BM Suaybaguio: Pagpang-apud-apud sa ECT wala namao, dili patas



Dili patas ang pagpanghatag sa ECT, sanglit mokabat pa sa 59,940 affected families ang wala pa matagai.



SCAN ME!

Mamahimong i-scan ang QR code aron makita ug madungog ang ika-unom nga Regular Session sa Sangguniang Panlalawigan

Daghan ang nahimong kalapasan sa pangpang-apud-apud sa hinabang nga Emergency Cash Transfer (ECT) nga nagkantidad P9,960, ngadto sa mga residente nga apektado sa kalamidad sa Davao del Norte.

Atul sa ika-unom nga Regular Session sa Sangguniang Panlalawigan (SP), gihingusgan ni Board Member Nicandro "Nickel" Suaybaguio, Jr. nga wala misubay sa lagda ang pagpanghatag sa maong ayuda, nga gipangunahan sa grupo ni Vice Governor De Carlo Uy.

Unang gitumbok ni Suaybaguio nga wala miagi sa buhatan ni Governor Edwin "Kuya Gov" Jubahib ang Department of Social Welfare and Development (DSWD) ug wala sila mihatag sa listahan sa mga benepisaryo sa ECT pay-out alang sa mga biktima sa pagbaha tungod sa shearline ug trough of LPA sa miaging tuig.

Wala pud ang presensiya sa mga personahe sa Provincial Disaster Risk Reduction and Management Office (PDRRMO) ug sa Provincial Social Welfare and Development Office (PSWDO), nga mao

unta ang angay mo-validate sa listahan sa mga benepisaryo.

Gibasa sa Board Member ang pipila ka probisyon sa Local Government Code (LGC) nga nagtino nga tahas sa gobernador ang pagpanguna sa pagpang-apod-apod sa mga hinabang ug dako kini'g responsibilidad sa panahon sa emerhensiya sa probinsiya.

"Ang adunay authority nga mo-represent sa LGU it's no less than the local chief executive... Ang pangutana, nganong wala gaagi sa local chief executive ang mga listahan sa nakadawat sa ECT?" maoy sulti ni Suaybaguio.

Butyag sab niya nga mao sab kini ang mulo sa mga mayor nga kaalyado ni Kuya Gov nga wala sab miagi kanila ang listahan sa DSWD.

Gitira sab ni Suaybaguio ang dagkong mga tarpaulin ug banners nga dunay mga nawong ni Uy ug mga kaalyado niini panahon sa payout, mga milapas sa probisyon sa DSWD Memorandum Circular No. 9, series of 2021.

"Ang paghatag karon sa ECT mura ra po'g campaign sorties sa politikanhong activity. Adunay dagko nga mga pictures sa mga politiko," ingon niya.

Dugang pa sa opisyal nga dili patas ang pagpanghatag sa ECT, sanglit mokabat pa sa 59,940 affected families ang wala pa nakadawat.

"Okay lang nga manghatag ta'g ayuda. Ang importante lang unta nga mopaingon ni sa tamang mga beneficiaries... kadto gyud nabahaan ug dili pipila lang kadtong political positioning nga gigamit ang ayuda for political advancement," paghinapos niya.

BM Suaybaguio, dili babag sa ayuda

Giklaro ni Board Member Nicandro "Nickel" Suaybaguio, Jr. nga dili siya babag sa paghatag og ayuda, basta kini mahatag sa tamang tao.

Gitumbok niini ang mga katawhang nagpait sa panginabuhì nga angay tabangan sa gobyerno, mga dili kanunay mokita sama sa mga driver sa motorsiklo o kaha biktima sa bisan unsang matang sa kalamidad.

Ingon niya, importante ang maayong pagdumala sa ayuda aron masiguro nga ang angayan nga mga benepisyaryo ang makadawat.

"Ang giingon sa balaud nga ang angay makadawat og ayuda kana ganing naglisud. Kung dili ka magtrabaho karong adlaw, wala pud kay mauli sa imong pamilya... Ingon ko dili man ko babag sa ayuda," matud ni Suaybaguio atol sa panagtigom sa Barangay Pagsabangan, Tagum City, Pebrero 12, 2025.

Ang mga programa nga iyang gipasabot

mao ang Ayuda para sa Kapos ang Kita (AKAP), Tulong Panghanapbuhay sa Ating Disadvantaged/Displaced Workers (TUPAD), Assistance to Individuals in Crisis Situation (AICS), ug Emergency Cash Transfer (ECT).

Sa samang higayon, duyog ni Suaybaguio si Governor Edwin I. Jubahib sa pag-apod-apod og tag-tulo ka kilo nga bugas matag pamilya sa siyam ka mga purok sa Barangay Pagsabangan isip kabahin sa Handog Pasaalamat Program ni Kuya Gov.

Gihimo usab ang programa sa Canocotan ug Apokon sa Tagum City, diin gitinguha sa gobernador nga magpadayon ang mga maayong serbisyo aron masiguro nga walay bisan kinsang mabiyaan, ug ang tanan makadawat.

Kauban sa gobernador sa maong kalihokan ang mga konsehal sa LGU-Tagum, opisyal sa barangay, ug ang iyang anak nga si Clarice Jubahib.





Handog Pasasalamat ni Kuya Gob, mainitong gidawat sa mga Tagumenyos

Luyo sa lain nga panahon, mapasalamaton ug mainiton nga gisugat si Governor Edwin "Kuya Gov" Jubahib sa mga lumulupyo sa Brgy. San Isidro, Madaum, Tagum City, human kini nagpahigayon og Handog Pasasalamat alang sa ilang kanunay nga pagsuporta sa kalambuan sa probinsya kaniadtong Pebrero 21, 2025.

Kauban ang iyang kinamaguwangang anak nga si

Clarice, gipanguluhan ni Kuya Gob ang pagpangapod-apod sa bugas, nga gibayloan og matam-is nga pahiyom sa katawhan. Giingong anaa sa 5,000 ang nakadawat sa gasa nga adunay unod nga 3 kilos matag beneficiary.

Hingpit ang pagpasalamat sa mga Tagumenyos, ilabi na nga gisiguro sa gobernador nga makadawat ang tanan sa maong gasa. Sa iyang pakighinabi kanila, iyang gisaysay ang mga dagkong kalampusan sa probinsya

ubos sa iyang termino, lakip na niini ang iyang pagsulong sa barato nga kuryente alang sa tibuok probinsya.

Dungag sa gobernador, magpadayon siya sa pagpatuman og mga program alang sa ikalambo sa probinsya kauban ang iyang mga kaagapay sa pagpanerbisyo. Anaa usab sa maong kalihokan sila Tagum City Vice Mayor Allan Rellon, BM Nickel Suaybaguio, BM Popo Estabillo, ug uban pang mga opisyal.



DavNor, gipalig-on ang Border Control Quarantine Checkpoints

Aron maprotektahan ang Davao del Norte batok sa hulga sa mga sakit sa kahayopan ug agrikultura, gipalig-on sa Provincial Veterinary Office (PVO) ang operasyon sa Provincial Border Control Quarantine Checkpoints.

Kini nga mga checkpoint nagmonitor ug nag-regulate sa paggawas ug pagsulod sa mga produkto sa agrikultura ug kahayopan aron masiguro nga luwas kini ug dunay saktong dokumento.

Matud ni Glenn Sitoy, team leader sa checkpoint sa J.P. Laurel, Panabo City, lakip sa ilang tahas ang hugot nga inspeksyon sa mga sakyanang nagdala og hayop ug karne.

"Ang among ginatan-aw dinhi ang ilang papeles sama sa NMIS (National Meat Inspection Service) permit,

Veterinary Health Certificate, ug shipping permit. Kinahanglan usab nga rehistrado ang ilang truck sa Bureau of Animal Industry," pahayag niya.

Gipasabot ni Senior Agriculturist Dr. Minelo Generale nga dako'g papel ang border control sa pagpugong sa makatakod nga sakit sama sa African Swine Fever (ASF).

"Mando sa atong Hon. Governor nga pakusgan ang pagbantay-ilabi na sa mga national highways-aron masiguro nga limpyo ug luwas ang mga produktong mosulod ug mogawas sa probinsya," mao'y iyang sulti.

Ubos sa pagdumala ni OIC Department Head Dr. Dennis Sumaoy ug sa kamandoan ni Governor Edwin "Kuya Gov"

Jubahib, padayon ang paningkamot sa PVO sa pagpahugot sa ilang mga estratehiya aron maprotektahan ang ekonomiya sa probinsya ug masiguro ang kahimsog sa mga produkto nga mogawas ug mosulod niini. Gidasig sab ang kooperasyon sa mga negosyante, mag-uuma, ug transporters aron masiguro ang hapsay nga pagpatuman sa mga lagda sa biosecurity ug quarantine measures.

Panghimangno niya sa publiko nga mosuporta sa mga inisyatiba sa gobyerno pinaagi sa pagsunod sa mga mando sa quarantine checkpoints ug pagpahibalo sa awtoridad kung adunay kadudahang aktibidad nga makadaut sa agrikultura ug ekonomiya sa probinsya.

MUSA Festival Global Fashion Runway, gisaulog atol sa ilang ika-lima nga anibersaryo



SCAN ME!

Mamahimong i-scan ang QR code aron makita ug madungog ang tibuok istorya ani nga balita

Nagpahigayon ang House of MUSA by Joy Soo og MUSA Festival Global Fashion Runway atol sa ilang ika-lima nga anibersaryo diin ilang gibida ang mga nagkalain-laing collections sa mga sanina gamit ang MUSA fabric gikan sa banana fiber.

Gipatugbaw sa maong event ang ka-colorful nga atake sa mga desenyong nagpatigbabaw sa tribu ug kultura sa mga dabawnon.

Nasuta sab ang paagi sa pagpili sa ilang mga modelo diin makita ang "inclusivity" nga bisan unsa man ang pangidaron, kaliwat, ug pamanit, mamahimong mu-representa ug mu-rampa sa maong runway event.

"The way I look at it is, [there's] a lot [of] diversity, like, models from 2 years old to 63 years old are here doing their runway modeling and at the same time also there are different colors because some came from all over the world... everyone is very welcome in this runway for the advocacy itself... and that's what makes it very exciting because of its inclusivity"

"I feel very proud. [It's my] honor and privilege to be here in the Philippines. I panel of MUSA Advocacy. I'm the premium ambassador and model and I'm very honored to close the festival. The designer [of my fit] is Michael that is an amazing designer and I feel very privileged to be here this evening"

Nailhan ang MUSA Fabric nga ginama sa mga Persons Deprived of Liberty (PDL) ug Correctional Institution for Women (CIW) nga mas nakapalahi niini sa ubang fashion company.

"It's always my honor and I'm very humble to be always associated with the house of MUSA. And having the advocacy getting all this support that we get from different models and advocates. And ofcourse we want to empower also different people that are involved and of course to empower the PDL and CIW, all the inmates that we are serving"

Sumala sa founder sa House of MUSA nga si Joy Soo, ang adbokasiya nagsugod lamang as 3 ka PDL ug nagpadayon hangtod sa kasamtangan.

"MUSA Advocacy is really close not just to my heart but also to the heart of all the Davao del Norte

advocates, not just the advocates parang ang dabawnon tanan. I started with 3 Person's Deprived of Liberty in the provincial jail and nagtuloy-tuloy na siya. Ang waver sa MUSA Fabric are mga PDL's. And also, with the help of of the Province of Davao del Norte, Department of Trade Industry, and Department of Labor and Employment namugna ni sya na project. Aside from the prisoners or the PDL's, natabangan sad ang atoang mga indigeneous community sa ata manubo tribe sa Talaingod ug ang maker sa atong earrings, MUSA De Arites we call it or the Kagan Muslim tribe sa Madaum," ingun niya.

Gibantog na ang MUSA Fabric sa 12 ka mga nasud apil na ang United States of America Canada, Australia, New Zealand, Switzerland, Japan, Thailand, Singapore ug uban pa.



One DavNor News

Tingog sa kabag-ohan alang sa tinuod na kalamboan

EDITORIAL BOARD

DR. MERVIN JAY SUAYBAGUIO

Editor-in Chief

NOEL BAGUIO

Managing Editor

JOSEPHINE ELESTERIO

Associate Editor

**HANNAH GRACE ZAFRA
JUN REY VILLANUEVA**

News Editors

**CATHY JANE FLORIDA
JONALD LALAS**

Layout Editors

**CAREN JANE DE VERA
LORNA TRIPOLI**

Correspondents

**ANDREW JOHN HABABAG
ROVEL TABELON**

Photographers/Photoeditors

**FERNAN REY MEJOS
LOU HELEN TAYONE
NILO CAAMPUID
JESS NAZARINE PASTER
GEORGE MAZO JR.
ALLENJUN JURAC
BENNY PARAN
JUELREY RUBIA
JERIC MIRAS
NICANOR RABACAL
ANICETO IPANAG JR.
MICHAEL SANCHEZ
ROLAND CABANA**

Circulation Team



Kuya Gov, nagsaulog sa Valentine's Day kauban mga magtutudlo sa DavNor



Isip pasalamat sa ilang dakong tampo sa kalamboan sa probinsya, gisaulog ni Governor Edwin "Kuya Gov" Jubahib ang Valentine's Day pinaagi sa paghatag og gasa nga rosas, tsokolate, bag, t-shirt ug uban pa ngadto sa mga magtutudlo sa Davao del Norte.

Gisugdan sa usa ka send-off ceremony sa Capitol Lobby, una na nga gihatagan ni Kuya Gov og mga gasa ang mga department heads, assistant department heads, ug iyang mga bisita nga sila kanhing Provincial Administrator Engr. Josie Jean Rabanoz, kanhing Santo Tomas Mayor Ernesto Evangelista, ug kasamtangang Mayor sa Braulio E. Dujali Atty. Leah Marie Moral-Romano.

Human sa seremonyas, gipanguluhan ni Kuya Gov ang pagpanghatag sa mga gasa didto sa elementary ug sekondaryang mga tulonghaan sa La Filipina sa Tagum City diin gisugat ang gobernador sa tamis nga mga pahiyom ug mainiton nga pagdawat sa mga magtutudlo.

Sa milabay ng mga katuigan sukad sa iyang paglingkod, ang mga tulonghaan lamang sa Tagum City ang kaya maapod-aporan sa mga gasa gikan kang Kuya Gov tungod sa kakulangan sa panahon. Apan, karong tuiga, dugang sa listahan ang pipila ka mga tulonghaan sa Panabo City.

Sa iyang mubo nga mensahe, gihandom ni Kuya Gov nga sa sunod maapil na ang mga magtutudlo nga anaa sa mga kabukirang bahin. Matud niya, dako ang iyang pagdayeg kanila sa sakripisyo nga ilang gihimo aron matagaan og sakto ug dekalidad nga edukasyon ang mga batang Dabaonon.

Natapos ang maong kalihokan sa kinasingkasing nga pagpasalamat ni Kuya Gov sa mga magtutudlo, diin nagkahiusa sila sa usa ka makalipay nga selebrasyon sa gugma ug pagpasalamat. Gihatod usab sa matag opisina sa Kapitolyo ang mga gasa sa uban pang eskwelahan sa probinsya.





Hustong pag-brush sa ngipon gitudlo sa mga kabataang IPs

Gitudloan sa mga dentista ang 106 ka kabataang Indigenous Peoples (IPs) sa hustong pamaagi sa pag-atiman sa ngipon atol sa selebrasyon sa National Dental Health Month, nga may temang "Pamilya, una kong dentista."

Gihimo ang kalihokan niadtong Pebrero 14 sa Dibabawon II Elementary School, Langilan District, Barangay Gupitan, diin gipasiugda ang importansya sa maayong oral hygiene.

Nakadawat ang mga kabataan og Oral Health Family Package sulod ang sabon, toothpaste, ug toothbrush alang sa ilang pamilya.

Gihatagan usab sila og modulyo sa dental care ug crayons alang sa ilang pag-eskwela.

Si Governor Edwin L. Jubahib, pinaagi sa Team Dental DavNor, mihatag og bugas sa mga IPs isip dugang suporta.

Samtang, nagpahigayon og espesyal nga programa sa pagpasalamat ang mga magtutudlo, kung asa gipasundayag sa mga kabataan ang ilang talento sa pagsayaw.

Gipasabot sa mga dentista nga ang sakit sa ngipon makabalda sa pagtuon sa mga bata, busa gikatakda nilang ipahigayon ang pag-ibot sa daut nga ngipon sa mosunod nga mga semina.

Ang aktibidad gipanguloan ni Dr. Ma.

Cristina Jimena, Dentist IV sa Provincial Health Office, uban sa mga dentista nga sila si Dr. Erma Adora F. Balani, Dr. Dahlia E. Cañete, Dr. Emmylou Novo, Dr. Custodio Caesar B. Nambong, ug Earl Ryan Salang. Kuyog usab nila ang mga dentista gikan sa North Davao Dental Chapter, sa panguna sa ilang presidente nga si Dr. Cheryl Trinidad, ug ang mga representante sa Philippine Dental Association Inc., Kapalong, ug Carmen District Hospital.

Ang maong kalihokan, nga unang gihimo sa Talaingod sa miaging tuig, nagpadayon sa misyon sa pagpanghatag og dental services alang sa mga kabataan sa Davao del Norte.

Sen. Bato: Atong ipakita unsa kaanindot ang Davao Region



Nanawagan si Senator Ronald "Bato" Dela Rosa nga undangan ang mga pagpangdaot batok sa Davao Region ug ipakita sa tanan kung unsa kaluwas ug kaanindot magpuyo sa rehiyon.

"Whatever mga paninira... We have to prove to them unsa ka guwapo ang mabuhi ug magpuyo dinhi sa rehiyon sa Davao. How safe Davao is, liveable, atong ipakita sa katawhan sa katibuk-an," sulti sa senador, atol sa Induction of

Regional Club Officers, New Members and Chartering of Davao South Elite Eagles Club sa The Fraternal Order of Eagles sa DavNor Gym, Tagum City.

Gihatagan og gibug-aton ni Dela Rosa nga imbes masakitan, angay isipon sa mga Dabawenyo nga usa ka dakong hagit ang mga pagsaway, sama sa nagkagrabe na daw nga traffic labi na sa Davao City, nga dili na daw luwas ang mga dakbayan sa rehiyon, nga dili na daw kini parehas sa una, ug uban pa.

Pangatarungan niya nga ang daghang

mga imprastruktura nga ginahimo sa mga kalsada, inubanan sa pagdagsang sa mga tawo, maoy hinungdan sa traffic, pero dugang niya nga "manageable" kaayo sa gihapon ang sitwasyon.

Mibarog ang senador nga nagpabiling pinakalabing maayo ang Davao Region sa tibuok nasud Pilipinas.

"Our region is still among the best there is in the country. Life is and will always be here," sulti niya.

Pero, nagpahinumdom ang senador sa dakong responsibilidad sa matag-usa aron padayon luwas ug nindot ang Davao Region.

Si Dela Rosa, kinsa subling magpapili isip senador sa umaabot nga eleksiyon karong bulan sa Mayo, naniguro nga maningkamot jud siya, labi na kay anaa ra siya sa ika-10 nga pwesto sa pinaka-ulahing survey sa Social Weather Station (SWS).

"Well, Number 10 is not a safe position (Dili luwas ang ika-10 nga posisyon). It is better to be running scared than to be complacent (Mas maayo nga hadlok ka nga nagdagan kaysa kompiyansa kaayo). So, maningkamot lang gihapon ta to improve some more," ingon niya.



Medical Mission sa DavNor, gikalipay sa katawhan

Gikalipay sa mga katawhan ang Balik Tulong Medical Mission nga gidalit sa Philippine Nurses Association of Metro Houston, Texas, USA niadtong Pebrero 5 sa DavNor Gym Sports and Tourism Complex, Mankilam, Tagum City.

Kini nga misyon nakigtambayayong sa probinsya pinaagi sa pamunoan ni Governor Edwin I. Jubahib, uban ang suporta gikan sa mga grupo sama sa Tagum City Lady Eagles Club, Rotary Club of Area 2D, Seventh-day Adventist Church, The Fraternal Order of Eagles, Philippines, Inc., Tudlo Tabang Foundation, ug mga volunteers.

Nanguna sa pag-atiman sa mga paseyente ang mga doktor sa Medical Mission, gipangulohan ni Director Dr. Jonatan Gecomo ug anhi presidente sa asosasyon nga si Dr. Gina Nerida Shanker.

Lakip sa kapin 30 ka mga doctors ug nurses si Dr. Michael Lacsamana gikan sa usa ka pribadong ospital sa Davao City nga nagmalipayong nangalagad alang sa medical check-up. Duyog sab sa medical services ang mga personahe gikan sa Provincial Health Office.

"We are located of course in Houston Area, but our home is always in the Philippines. So, we have to make sure that all the things that we're doing is also dedicated to our home country. We have to make sure

that we have at least once every year that we are doing this. And then, part of our mantra for this year also is to give a way of some scholarship grants for nursing schools here in the Philippines... We have to tie up again with the government and all, we are hoping to continue the process and to continue this medical mission," sulti ni Dr. Gecomo.

Adunay gitanyag nga libreng mga medisina, bitamina, ug nanghatag usab og mga school bags ug tsinelas sa mga kabataan. Ang Balik Tulong Medical Mission naghatag og lain-laing mga serbisyo sama sa eye care (libreng eyeglasses), dental extraction, tuli, pediatrics, obygne, ug minor surgeries.

"We are the ones that are really funding the program and then we have volunteers from Houston, from Chicago, from Florida, so all over pretty much sa States and there are partners, our mission partners are from the Adventist team, and then the His Footsteps team also... Kuya Gov, thank you so much for your support. We do appreciate it, that's why mobalik gyud mi kay para makatabang 'ta sa atong kapwa ka-DavNor,' ingon ni Dra. Shanker.

Ang susamang misyon gikatakhang ipahigayon sa Pebrero 6 ngato 7 sa Mabini, Davao de Oro aron padayon nga matabangan ang mas daghang katawhan.



Kampanya batok Tuberculosis, gipakusgan sa DavNor Kapitolyo

Gipahigayon ang unang hugna sa oryentasyon bahin sa tuberculosis alang sa mga kawani sa lainlaing opisina sa Kapitolyo.

Ang kalihokan, nga gipangunahan ni Dr. Dominic Basalo sa Provincial Health Office (PHO), nagtumong sa pagpahibalo sa mga empleyado kalabot sa paglikay ug pagtambal sa maong sakit.

Kini nga aktibidad kabahin sa Health and Wellness Program ni Governor Edwin I. Jubahib aron masiguro ang kahimsog sa mga kawani sa kapitolyo. Giingnan ni Dr. Basalo ang mga empleyado nga ang TB dali ra mokaylap pinaagi sa hangin ug importante ang regular nga check-up. Giawhag usab niya ang mga nataptan sa sakit nga mopailalom sa "Tutok Gamotan Program," usa ka libreng programa sa pagtambal sa TB.

Mipadayag sa iyang suporta si Provincial Information Officer Dr. Mervin Jay Z. Suaybagueio, diin iyang sulti nga mahinungdanon kini aron malikayan ang pagkatap sa TB.

"Kung naa man sa atoa simbako lang makakuha anang sakita, anaa ang Provincial

Government always, to help us para maayo ta." sulti niya.

Ang tuberculosis, nga kasagarang mailhan pinaagi sa ubo nga molungtad og duha ka semana o labaw pa, kinahanglan matambalan dayon aron malikayan ang komplikasyon ug pagtakod. Pinaagi sa hapsay nga impormasyon ug suporta sa gobyerno, mas mapalig-on ang kahimsog sa probinsya.

Ang tuberculosis, nga kasagarang mailhan pinaagi sa ubo nga molungtad og duha ka semana o labaw pa, kinahanglan matambalan dayon aron malikayan ang komplikasyon ug pagtakod.



Mas maayong serbisyo publiko, gipasiugda sa duha-ka-adlawng seminar sa Kapitolyo

Gipahigayon ang duha ka adlaw nga seminar bahin sa Enhanced Basic Customer Service Skills with Ease of Doing Business in the Government Service alang sa mga piling mga empleyado sa Probinsyal nga Panggamhanan sa Davao del Norte sa Capitol Pavilion, DNSTC, Mankilam, Tagum City, Pebrero 18-19, 2025.

Gihatagan og gibug-aton ni Provincial Human Resource Management Officer Edwin Palero ang panginahanglan sa maayong pagserbisyo sa katawhan ug ang pagpatuman sa mas episyenteng proseso sulod sa kapitolyo.

“So, that’s part of our design to improve our workforce. Why? Because we want to improve service delivery which is one of the major and essential goal sa Prime HRM which is improved or excellent public service. In other words, in one sentence, kung ang inyong client pag-uli sa balay nalipay, nagngisi tungod

sa inyong pagserbisyo, mura’g epektibo ni siya nga training,” ingon ni Palero.

Tinguha ni Governor Edwin “Kuya Gov” Jubahib nga mas mapalig-on ang kalidad sa serbisyo publiko ug mapaayo ang pagproseso sa tanang transaksyon sa Kapitolyo, kini gibutyag sa iyang representante nga si Executive Assistant IV Jemuel Melmida.

“Kuya Gov Edwin Jubahib truly loves the people of Davao del Norte. His leadership is guided by his unwavering commitment to provide genuine and selfless service to every citizen. He works tirelessly to ensure that government services are accessible, fair and beneficial to all. As government employees, we must also reflect this dedication in our daily work. Let us follow his example by serving with honesty, integrity, and a sincere desire to improve the lives of our fellow citizens,” sulti ni Melmida.

Ang mga resource persons sa maong seminar naggikan sa Civil Service Commission Region XI nga gilangkoban nila Karla L. Magalay ug Ira P. Hierro, puros mga HR Specialist II.

Tinguha sa maong seminar nga mapaambit sa mga empleyado sa Kapitolyo ang saktong pamaagi sa pagserbisyo sa katawhan. Samtang, kanunayang naningkamot ang Probinsyal nga Panggamhanan sa Davao del Norte nga mapausbaw ang kalidad sa tanang serbisyo sa Kapitolyo.

Persona non grata...

dakong bili sa gobernador ang iyang “Serbisyonng Patas Walay Kaltas” nga polisiya, kung asa buot niya nga ang tanan makatagamtam og maka-angayon nga serbisyo.

Gibutyag usab niya sa katawhan ang kalampanan sa probinsya ubos sa iyang administrasyon, ug ang mga plano niya sa umaabot.

Lakip na niini ang Zero-billing Program sa mga gobyernong ospital ug ang pagkadeklara sa probinsya isip insurgency-free province.

Usa sa mga tinguha ni Kuya Gov mao ang pagtukod og District Hospital sa nasampit nga baryo gumikan sa pagdaghan sa mga lumulupyo, aron dili na sila kinahanglan magdasok sa Carmen District Hospital. Ang pagtukod og maayong panglawas sa matag Dabawnon usa sa mga punto sa iyang KUYA GOB NG MASA 13-Point Agenda.

Lakip na usab niini ang pabahay program nga nasugdan na sa mga lungsod sa New Corella, Asuncion, Talaingod, ug Kapalong. Gipasabot sa gobernador nga kini ipatuman usab sa lungsod sa Sto. Tomas.

Gitambongan ang maong programa sa mga lokal nga opisyal sa lungsod, kauban nila ang kanhing Provincial Administrator Engr. Josie Jean Rabanoz, Igacos Mayor Al David Uy, Braulio E. Dujali Mayor Atty. Tata Moral-Romano, ug uban pa. Nisalmot usab ang kinamagulangan nga anak ni Kuya Gov nga si Clarice, nga kandidat sa umaabot nga eleksyon alang sa posisyon nga bise-gobernador.

Kahibaloan usab nga si Kuya Gov nailang Most Outstanding Governor of the Year sa nasudnong pasidungog, tungod sa iyang maayong pagdumala sa panggobyerno ug pagkigbisog alang sa hustisya sa mga nilupigan.



Kuya Gov Edwin Jubahib truly loves the people of Davao del Norte. His leadership is guided by his unwavering commitment to provide genuine and selfless service to every citizen. He works tirelessly to ensure that government services are accessible, fair and beneficial to all.

JEMUEL MELMIDA
Executive Assistant IV



PLGU DavNor, gitanyag ang best practices isip consistent SGLG Awardee



Sa pag-benchmark sa Probinsyal nga Panggamhanan sa Agusan del Sur dinhi sa Kapitolyo niadtong Pebrero 26, gibida sa PLGU-Davao del Norte ang ilang mga nahimong best practices sa pagkab-ot sa Seal of Good Local Government (SGLG) Award.

Sa pagpanguna ni Provincial Administrator Atty. Ralph Dela Cruz, gitanyag sa mga PG Department Heads ang ilang mga buhatan aron masakmit ang maong award, ubos sa mga sukdanan nga Financial Administration and Sustainability, Disaster Preparedness, Social Protection and Sensitivity, Health Compliance and Responsiveness, Sustainable Education, Business-Friendliness and Competitiveness, Safety, Peace and Order, Environmental Management, Tourism, Heritage Development, Culture and Arts, ug Youth Development.

Sulti ni PA Dela Cruz, usa ka oportunidad ang kinhing benchmarking session aron mapakusgan sa duha ka mga

panggamhanan ang ilang tinguha nga makahatod og maayo nga pagpanerbisyo sa katawhan.

"Kini man gu'ng SGLG, challenge jud kaayo. Coveted jud kaayo nga maawardan ang atoang LGU. Not only in the award itself, but it exemplifies outstanding leadership, accountability, transparency, and service delivery... Through today's benchmarking session, we will explore the best practices that have made a positive impact in sustaining our SGLG accreditation. This collaboration aims to inspire one another, exchange ideas, and identify new strategies that can further enhance our efforts in serving our constituents," sulti ni PA Dela Cruz.

Gitambongan sa mga personahe gikan sa Probinsyal nga Panggamhanan sa Agusan del Sur ang maong aktibidad, kung asa gipaabot nila ang ilang mga pangutana mahitungod sa pagdumala. Sumala ni PLGU-Agusan del Sur Acting Provincial Assistant Administrator Almira Salinas,

dinhi sa Davao del Norte sila nagbenchmark tungod sa pagka-consistent awardee niini sa maong ganti.

"Since multi-awarded ang DavNor sa SGLG, so gitan-aw nato kung giunsa ug nanong consistent mo na awardee. Nag-aim ang Agusan [del Sur] nga consistent pud sa SGLG. So nagpatabang ta.. Daghan kaayo ta og nakita dinhi nga pwede namo ma-replicate, pwede namo ma-improve nga services sa Agusan," ingon ni PLGU-Agusan Del Sur Acting Asst. PA Salinas.

Mitungha usab sa aktibidad ang representante gikan sa Department of Interior and Local Government Davao del Norte nga si Catherine Pugosa, kung asa iya usab gitanyag ang papel sa ahensya sa pag-assess sa matag LGU.

Nailhan isip "Mother of All Awards" ang prestihiyosong SGLG Award, diin nakab-ot na kini sa Probinsyal nga Panggamhanan sa Davao del Norte sa ikaupat nga higayon ubos sa administrasyon ni Governor Edwin "Kuya Gov" Jubahib.

Sayo nga pagdiskobre sa kanser, dakong bintaha alang sa pag-ayo

Dako gyud nga bintaha nga sayo masayran ang sakit nga kanser kay mas taas ang tyansa nga mamaayo pa ang pasyente.

Mao kini ang gipadayag sa mga doktor gikan sa Davao Regional Medical Center (DRMC) sa programa nga Kapihan sa DavNor nga gidumala ni PIA-Davao del Norte InfoCen Manager Jeanevive Abangan, nga madungog sa DXNR 91.1 FM ug PTV DavNor 48.

Sa programa, gipaambit nila DRMC Medical Oncologist Dr. Genecar Erfe, Medical Dentist Dr. Judy Grace Mejos, ug Health Education Promotion Staff Maevel Asumbrado ang mga maayong pagtambag kabahin sa gituki nga Cancer Awareness and Oral Health Month.

Gibutyag nila ang kamahinungdanon

sa pagtiwas sa treatment aron masalbar ang kinabuhi sa mga pasyente. Sulti nila, pagsugod sa pandemya niadtong tuig 2020 hangtod 2024, mitaas ug 300 porsento ang ihap sa mga cancer patient sa DRMC. Nanggikan ang mga pasyente sa mga rehiyon sa Caraga, Visayas, ug Davao Region.

"Medyo worrying na ang kadaghan sa atoang cases nga mga cancer [kay] not only sa mga batan-on but across all ages, so siguro naa gyud ni kalabutan sa atoang lifestyle, sa atong panginabuhi, sa atong genetics, and of course makita naman gud nato karon sa atong technology, mas daghan natang mga diagnosed, daghan na pod ta'g makita nga cancer patient," ingon ni Dr. Erfe.

Prevention is better than cure. Kini usab ang panawagan sa mga dentista sa ingon dili moresulta sa komplikasyon ang simpleng sakit sa ngipon.

"Preventive unta atoang himoon, dili kanang end point nga ibot kasagaran... so any hubag or any sakit or maski walay gasakit nga ngipon, the fact nga nagalata na siya, it's [a] cause for worry kay infectious mana, [it] goes to your blood. Kung diabetic ka ug naa kay sakit sa heart, mu-complicate na kaayo ang imong status ana."

Padayon nga nagadawat og mga pasyente ang Cancer Center for Mindanao ubos sa pagdumala sa DRMC uban sa suporta sa mga LGUs ug sa Department of Health.

Knights of Columbus nilagda alang sa pagpanalipd sa kinabuhi

Nagkahiusa ang mga nagkadaiyang pundok sa paglagda sa "Wall of Commitment" nga gipangunahan sa Knights of Columbus, mga lumilihok sa parokya, kaparian, ug uban pang indibidwal, kaniadtong Pebrero 22, 2025, sa New Christ the King Cathedral, Tagum City.

Atol sa culmination program sa Knights of Columbus, gi-highlight ang pagpirma sa maong pader nga nagpadayag sa ilang kaakohan sa pagpanalipod sa dignidad sa kinabuhi, sugod sa pagkahimugso hangtod sa natural nga kamatayon.

Gipasidunggan usab nila ang kultura sa gugma, kalinaw, ug pagtahod alang sa tanan, samtang nag-awhag sa pagpakabana alang sa wala pa matawo, mga katigulangan, ug mga marginalized. Ilang gi-ampingan ang bili sa kinabuhi pinaagi sa mga pulong ug buhat, ug gisubli ang pagpalig-on sa pagtuo kang Kristo Hesus.

Nagsilbing mamumulong si Diocesan Pastoral Director Rev. Fr. Freddie Barte, kung asa gibatbat niya ang mga maayong panag-ingnan isip Kristohanon. Matod niya, ang mga opisyal sa gobyerno angayan nga magtagad ug mobati alang sa mga kabus nga wala pagpihig.

"Ang synodal wala labaw, ang



synodal wala pinili, because we are all chosen people of God," ingon ni Rev. Fr. Barte.

Ang kalihokan kabahin sa tinuig nga "Walk for Life 2025," nga adunay tema nga "Uban sa Panaw sa Kinabuhi." Kini nga tema nag-awhag sa pagbarog alang sa pagrespeto sa dignidad sa kinabuhi ug sa pagpasiugda sa pagkabalaan sa matag-usa, samtang gipadasig ang mga magtutuo sa pagbarog sa kinabuhi nga

puno sa dignidad.

Gidumalahan ni Most Rev. Medel Aseo ang misa kauban sila Rev. Fr. Jaime Ozoa, ang K of C Diocesan Coordinator, ug uban pang mga miyembro sa Knights of Columbus gikan sa Sta. Teresita Parish sa Nabunturan, mga parokyano sa Pantukan, Davao de Oro, Daughters of Mary Immaculate International, ug uban pa nga nagtinabangay alang sa maong aktibidad.

ION Davao del Norte nagpahigayon sa unang miting, learning session sa 2025



Gipahigayon sa Information Officers Network Davao del Norte ang ilang unang regular meeting ug learning and development session alang sa tuig 2025 sa PAGRO Training Hall sa Provincial Government Center niadtong Pebrero 13.

Gipangunahan ni Panabo City

Information Officer ug ION President Michael Angelo Resueño ang diskusyon kabahin sa mga plano karong tuiga, membership obligations, monthly hostings, ug agency updates. Sumala ni Resueño, makatabang ug dunay benepisyo ang paghatag og mga bag-ong kasayoran ug kaalam sa

mga information officers lakip na ang paghisgot alang sa mga umaabot nga training ug mga aktibidad.

"Ang among tumong ug tinguha isip mga information officers sa Davao del Norte, nga magkahiusa mi, magkahibal-anay kung unsa ang mga updates sa among tagsa-tagsa nga ahensiya... So, importante nga kami, mga naa sa lokal, kabalo mi unsa among matabang sa ilaha nga masuportahan namo ang ilahang mga programa, ug even ang nasyonal pud nga mga government agencies makabalo kung kinsa ilang maduolan sa local government units," ingon niya.

Samtang pagkahapon, gisugdan ang learning and development session nga gipangunahan ni Atty. John Cyril Pagatpat kinsa mihatag sa lektura kalabot sa "Media Laws" nga magamit sa matag usa aron mapalambo ang komunikasyon ug serbisyo sa publiko pinaagi sa saktong paggamit sa impormasyon.



Proposed Port Zone Delineation sa IGACOS, gi-endorso sa PDC



SCAN ME!

Mamahimong i-scan ang QR code aron makita ug madungog ang tibuk istorya ani nga balita



Gi endorso sa Provincial Development Council ang Proposed Port Zone Delineation sa Babak ug Tagpopongan sa Island Garden City of Samal (IGACOS), atol sa gipahigayon nga PDC Meeting sa Capitol Pavilion. Tungod kay limitado ang kapasidad sa Davao-Samal bridge ug dili tanan cargos makaagi dinhi, katuyoan sa maong proyekto nga mag-operate og rationalized national system aron

mapausbaw ang pagpatigayon sa probinsya.

Dako ang tabang sa gihanyag nga port ilabi na kung adunay natural nga kalamidad sama sa linog ug dili magamit ang maong tulay, magsilbi kining alternatibong agianan para sa mga motorista.

Matud ni Acting Provincial Planning and Development Coordinator Engr. Hazel Zafrá, ang

maong proyekto naglangkob sa kaayohan sa komunidad. Gitanyag usab ni Engr. Zafrá ang uban pang gihisgutan nga mga plano sa PDC Meeting alang sa kaugmaon sa probinsya.

"Ang Provincial Development Council mao na siya ang magdiscuss, deliberate kung tama ba gyud atong mga proyekto aron atong mga communities mahatagan gyud og kahapsay ug comfortable life. Sama sa giingon pa, na we are leading to panatag na buhay, ambisyon 2040," ingon ni Engr. Zafrá.

Gipangulohan ni Governor Edwin "Kuya Gov" Jubahib ang maong meeting, diin apil nga gihisgutan ang Ancestral Domain Agricultural Implementation Framework ug Park Accomplishment Development Project.

Gitagaan usab og pagtagad sa maong aktibidad ang mga establisamento ug proyekto nga malampusong natukod ilawom sa administrasyon ni Kuya Gov, lakip ang uban pang mga plano nga angay tagaan og pagtagad alang sa kalambuan sa probinsya.

Serbisyo sa DMW Rehiyon 11 ipaduol sa komunidad

Nagmugna og Capacity Enhancement Training alang sa ilang mga stakeholders ang Department of Migrant Workers (DMW) Region XI, sa Bulwagan ng Karunungan, Provincial Government Center, Mankilam, Tagum City, niadtong Pebrero 26, 2025. Uban kini sa pakig-alayon sa Probinsyal nga Panggamhanan sa Davao del Norte ubos sa pagdumala ni Governor Edwin I. Jubahib.

Misalmot ang mga social workers gikan sa nagkadiyang dapit sa probinsya, kauban usab ang PNP IGACOS, mga Public Employment Services Office (PESO) Managers, ug grupo sa mga Overseas Filipino Workers (OFWs).

Tumong sa aktibidad nga mahatagan og giya ang mga Lokal nga Panggamhanan (LGUs) ug uban pang mga stakeholders bahin sa mga balaod, regulasyon sa mga overseas employment, ug pagtanyag sa serbisyo alang sa mga OFWs. Gipasabot niini ang kasigurohan ug pagpanalipod sa mga katungod ug kaayohan sa mga OFWs

ug sa ilang mga pamilya pinaagi sa pagpatin-aw sa mga programa sa DMW.

Gihisgutan usab ang pag-atiman sa mga espesyal nga kaso nga ilang gina-atubang. Usa sa mga tinguha niini mao ang pag-establisar sa main desk alang sa mga OFW sa nagkadiyang komunidad, nga mag-alagad isip dalangpanan alang kanila ug sa ilang mga pamilya.

Alang usab sa hinabang pinansyal, mamahimong ma-avail sa mga kababainhan ang 'Balik Pinay, Balik Hanapbuhay' nga programa ug ang Livelihood Development Assistance Program para sa mga kalalakihang OFWs.

Buot ni DMW OIC-Assistant Regional Director Maria Rose Escalada nga mapaduol ang kinhing mga serbisyo ngadto sa k

"Ang services sa Department of Migrant Workers kailangan nga ibutang siya sa community, so sa stakeholders gyud sya, ang atoang OFWs families dili na kailangan mo travel pa sa amoang office didto sa Davao City, but they can have the same services

didto sa ilahang municipality through sa OFW Help Desk," sulti ni Escalada.

Gipatuman usab sa Welfare and Reintegration Services Division (WRSD) ang mga livelihood program ug hinabang pinansyal labi na sa mga distressed OFWs.

Kailangan nga makabalo mo kung asa mi ninyo ma kontak so please check the Department of Migrant Workers website dmw.gov.ph, kay ngano man? Para inyong paggawas safe sya, dili ta mabiktima sa ilegal recruitment kay kana sya sakit kaayo na sa inyoha ug labi sa inyong pamilya," dungag ni Escalada.

Base sa datos sa DMW, sa pagkakaran, ang Davao del Norte mao ang ikaduhang probinsya nga adunay pinakadaghan nga OFWs nga misaka sa 52,772, nag-una ang Davao del Sur nga adunay 132,321 ug nikatulo ang Davao de Oro nga adunay 22,888 nga mga Overseas Filipino Workers.